

La aree linguistiche furlane

La aree linguistiche furlane e cjape dentri la porzion nordorientâl de penisule taliane. A nord il limit de aree furlanofone al è segnât dal spartiaghis alpin, a est il limit al cor cumò paralêl al confin di stât cu la Slovenie, par lâ po dopo daûr dal cors bas dal Lusing fintremai al mâr; a sud il limit al è segnât dal mâr Adriatic, intant che a ovest la aree furlanofone e confine cu la region venite, sul cors alt de Livence, par lâ jù dopo fintremai al mâr, gjavant la part plui occidentâl de provincie di Pordenon e cjapant dentri la part orientâl de provincie di Vignesie. La popolazion cun competence ative dal furlan in region e je tor dal mieç milion di personis, daûr dai dâts di une inchieste sociolinguistiche resinte, prontade de Universitât dal Friûl.

Tachìn intant cu la gjeografie e cun cualchi numar, par segnâ la aree che o vin di fevelâ, vâl a dî metint i limits dal cjamp che o podìn calcolâ che furlan, par ce che al tocje la lenghe, e, cun d plui, di trops che o podìn calcolâ che a sedin chei che a fevelin par furlan. La gjeografie è à la sô impuartance, cemût che al è naturâl, par vie che il Friûl si cjate, sedi cumò che pai tims indaûr, intun puest di passaç e di incuintri di culturis e di popui diviers, un puest dulà che si tocjin lis trê animis 'linguisticis' principâls de Europe: chê neolatine, che e je la nestre, chê gjermaniche e chê slave.

A nord il limit de region linguistiche furlane al è segnât dal spartiaghis alpin, lant daûr dal confin politic tra Italie e Austrie; a est il limit al cor paralêl al confin di stât tra Italie e Slovenie, par lâ po dopo dilunc dal cors bas dal Lusing, che al divît la part furlanofone de provincie di Gurize, a man drete dal Lusing, di chê a man çampe dal flum che no je di lenghe furlane; a sud il limit al è segnât dal mâr Adriatic; a ovest la aree furlanofone e corispuint al confin amministratîf cu la region dal Venet sul cors alt de Livence, e po dopo e ven jù fintremai al mâr Adriatic lassant fûr la part occidentâl de Provincie di Pordenon – cun paîs tant che Cjanive, Sacîl, Prate e ancje Pordenon stes, che al è la capitâl de provincie – e cjapant dentri un toc di chel che al jere il mandament di Puart, in provincie di Vignesie – cun paîs tant che Gruâr, Tei, Fossalte, San Michêl dal Tiliment – che al è stât gjavât de Patrie dal Friûl te prime metât dal Votcent.

Al merte notât in curt il fat che ancje a Triest e a Mugle si fevelave par furlan, cu lis varietâts tergestine e muglisane, e che il furlan al è stât lassât di bande a man a man cjapant sù dialets di fate venite. A Triest, in particolâr, il mudament lenghistic al è sucedût tor de metât dal secul XIX, a Mugle impen su la fin di chel stes secul. Di chestis varietâts 'pierdudis' di furlan a restin in ogni câs putropis testemoneancis, con tescj leteraris e tescj religjôs. La aree linguistiche furlane e je daûr a strenzisi, ancje se di pôc, sul confin occidentâl de region, pe pression dai dialets venits che a son dongje, e chest staronzament si compense in part cuntune expansion dal furlan a nord e a est, li che al cjape il puest di varietâts slovenis e todescjis che a son tal teritori regionâl.